

Forno di calki mester bira un proyecto di inclusion social den Rancho

ORANJESTAD – Ayera e forno di calki cu ta un monumento protegi, tabata accesibel pa publico bou e guia di fundacion Rancho en conexon di Dia di Betico.

E ta un monumento cu ta den man di fundacion Monumenten Fonds pa wordo restaura y asina musta e



splendor di su hubentud, pero tambe su balor historico socio-economico di Rancho.

Pero actualmente mirando e problematica social cu ta existi den e bario aki, e forno di calki a bira practicamente un refugio pa e adictonan ambulante, unda nan ta drumi y te hasta haci nan necesidadnan fisiologico.

Actualmente a lo menos tin acceso na dje, pero practicamente pa añanan tabata dificil pa yega eynan. Presidente di e fundacion Rancho, sr. Clifford Rosa a indica cu awe nos por ta orguyoso cu nos por musta e monumento aki cu ta un orguyo pa tur rancho. Pero principalmente pa e hendenan ora cu ta bishita e monumento aki por imagina e funcion cu e forno di calki tabatin den pasado. E doño di e forno tabata sr. Chago Tromp kende a produci calki pa traha y drecha casnan; y e tabata comercialisa su calki di tal forma, cu pa añanan a bira un actividad economico den e bario aki.

Icono rancho



Aunke no tin un data specifico riba antiguedad di e forno, ta wordo calcula cu e tin alrededor di 150 pa 200 aña di existencia cu a wordo lanta den pleno curason di Rancho. Si E Faro ta un icono nacional, nos por bisa cu e forno di calki ta un icono pa rancheronan. Nan a wordo lanta mirando e forno aki como un testigo mudo di tur loke ta pasa den e bisindario aki. Un testigo mudo cu a pesar di su edad, e no kier muri prome cu e por haya un cirugia plastico. Pero e punto aki ta uno masha compleho. Mientras cu Monumenten fonds tin e fondo disponibel pa restaura e monumento aki y te hasta personanan interesa pa inverti den e bisindario, dificilmente nan no por haci nada te ora cu e problematica social di e adictonan ambulante por haya un solucion satisfactorio y duradero.

Nan ta ser humano cu mester di atencion y solucion pa nan problema di adiccion. Pero tambe un parti di nan ta rancheronan di puro sepa cu a cay den e mal caminda di e

droga, y cu tin un sentimento di pertenencia cu e bario mas bieu di Oranjestad.

Inclusion social

Bon Dia Aruba a consulta un fuente cu a prefera di keda anonimo kende a bisa cu pa atende e situacion aki y pa asina e bario por disfruta di un bon imagen mester di un trabou conhunto di tur instancia, y no solamente di esunnan cu tin di atende cu infraestructura y monumento. E forno di calki mester bira un proyecto di inclusion social den Rancho. Ya cu e forno di calki restaura lo bira riba su mes gewoon un monumento di piedra. Pues e no lo tin e mesun balor si e no ta conta e historia di su hendenan cu a lanta rond di dje. Pero pa esaki lo por sosode e hendenan di e bario mes mester colabora activamente cu e proyecto aki cu finalmente lo beneficia tur rancho directamente.

Unabes cu e proyecto di restauracion di e forno di calki lo bira oficial, e bario mester musta su bunitesa monumental cu a wordo camufla cu tur e murayanan cu a wordo lanta como forma di proteccion.

Aparentemente tin un acercamento cu e habitantenan di e bario pa asina e proyecto di restauracion di e forno di calki lo por bira un realidad cu lo trece otro imagen y dinamica positivo den Rancho, y no un monumento cu cada dia ta muriendo y unda e adictonan ta intoxica nan culpa. □